



「大智度論」集粹之五十七

因由... 二、主氣與無常... 「無常」者，謂一切法皆無常。...

二、主氣與無常

論菩薩摩訶薩，不具四攝... 諸波羅蜜無差別，若無般若波羅蜜，五波羅蜜則不得波羅蜜名字...

論菩薩摩訶薩方便力脫眾生生死

度脫眾生生死

智銘

般若波羅蜜無法可取，無法可捨。何以故？一切法不取不捨。般若波羅蜜於色不取不捨，於受、想、行、識，乃至阿耨多羅三藐三菩提不取不捨。

佛告須菩提：「是菩薩摩訶薩成就方便力者，發心已來無量億阿僧祇劫。供養如恒河沙等諸佛，從初發意已來於檀波羅蜜無不具足，於尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜無不具足。... 菩薩摩訶薩行六波羅蜜時，作是念：是世間心皆顛倒，我若不行方便力，不能度脫眾生生死，我當為眾生成行檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜。是菩薩為眾生成故，捨內外物，捨時作是念：我無所捨。何以故？是物必當壞敗。為眾生成故，終不破戒。何以故？菩薩作是念：我為眾生成阿耨多羅三藐三菩提，若殺生、若作邪見、若貪著聲聞、辟支佛地，是所不應。為眾生成不瞋，乃至不生一念，菩薩如是思惟：我應利益眾生，云何而起瞋心？為眾生成，乃至阿耨多羅三藐三菩提，常不生懈怠心。為眾生成，乃至得阿耨多羅三藐三菩提，不生散亂心。為眾生成，乃至阿耨多羅三藐三菩提終不離智慧。何以故？除智慧不可以餘法度脫眾生成。菩薩能如是行，能具足六波羅蜜。」

益，善根增益故，具足諸波羅蜜。諸波羅蜜具足故，得阿耨多羅三藐三菩提，何以故？不念色，乃至不念阿耨多羅三藐三菩提時，便得阿耨多羅三藐三菩提。

以念故著欲界、色界、無色界、不念故無所著。如是，菩薩摩訶薩行般若波羅蜜，不應有所著。

菩薩摩訶薩如是行，不住色，乃至不住一切種智。不著故不住，何以故？是菩薩不見有法可著可住，菩薩摩訶薩以不著不住法，行般若波羅蜜。

菩薩摩訶薩作是念：若能如是行、如是修，是行般若波羅蜜，我今行般若波羅蜜，修般若波羅蜜，若如是取相，則遠離般若波羅蜜，若遠離般若波羅蜜，則遠離檀波羅蜜，乃至離一切種智。何以故？般若波羅蜜無有著處，亦無著者，自性無故。菩薩摩訶薩如是取相，則於般若波羅蜜退。若退般若波羅蜜，則是退阿耨多羅三藐三菩提，不得受記。

若菩薩摩訶薩行般若波羅蜜，作是念：諸法無所有，不可取，若法無所有、不可取，則無所得。若如是行，爲行般若波羅蜜。若菩薩摩訶薩著無所有法，則遠離般若波羅蜜。何以故？般若波羅蜜中無有著法故。

菩薩摩訶薩行般若波羅蜜時，不生色、是色、誰色。乃至一切種智不生，是一切種智、誰一切種智。如是，菩薩能生般若波羅蜜，乃至一切種智。菩薩摩訶薩行般若波羅蜜時，不觀色若常、若無常、若苦、若樂，若我、若非我，若空、若不空，若離、若非離。何以故？自性不能生自性，乃至一切種智亦如是。菩薩摩訶薩行般若波羅蜜，如是觀色，乃至觀一切種智，能生般若波羅蜜。乃至能生一切種智。

一切種智是菩薩摩訶薩道，是名菩薩摩訶薩道、非道。般若

波羅蜜爲大事故起，所謂示是道，是非道。是般若波羅蜜爲度無量衆生故起，爲利益阿僧祇衆生故起。般若波羅蜜雖作是利益，亦不受色、亦不受受、想、行、識；亦不受聲聞、辟支佛地，般若波羅蜜是諸菩薩摩訶薩導，示阿耨多羅三藐三菩提，能令離聲聞、辟支佛地，住薩婆若。般若波羅蜜無所生、無所滅，諸法常住故。┌

菩薩發心已來，無量阿僧祇劫，供養如恒河沙等諸佛，種諸善根。從初發心已來，具足六波羅蜜，一切福德無不作者，一切善法無不修集，是爲度脫衆生生死。

一切衆生無恩於菩薩，而菩薩常欲利益。是諸衆生或欲奪菩薩命，割截身體，菩薩欲以第一佛樂智慧命，欲與衆生，是爲希有。菩薩於四生中，以大悲心憐愍衆生故，能隨所願行一切法，大智慧力故，破衆生著善法心。如是六波羅蜜等諸善增長成就，直至阿耨多羅三藐三菩提。

菩薩雖行五波羅蜜，不得般若波羅蜜，不得名波羅蜜，以不破著心故。菩薩乃至能自以身命布施，若無般若，其心易破。若有般若，則不可破壞。菩薩行種種諸餘深法，不得般若，不名爲行波羅蜜，但名爲行善法，有量有盡故。

爲般若波羅蜜，故說五波羅蜜，若人能直行諸法實相，則不爲說布施等，入般若初門，以人鈍根罪重故，種種因緣說：以布施破慳；持戒折薄諸煩惱；忍辱開福德門。能行難事；精進如風吹火，熾然不息；禪定攝心一定，觀諸法實相故。是五波羅密，皆趣向般若波羅蜜。布施等諸善法，爲般若波羅蜜所守護故，得至薩婆若。薩婆若即是般若異名，五波羅密福德，入般若波羅蜜中，即得清淨般若，般若清淨故得佛道，變名薩婆若。是故言：入薩婆若，即是入般若。有人疑諸波羅蜜各各有力，何以獨言般

若波羅蜜功用爲大？是故言：導五波羅蜜，所可修集成辦，皆仰般若。

菩薩行般若，作是念：諸法雖畢竟空，衆生狂顛倒故，深著不解，我若不以方便力，則不可得度。方便者，所謂金色身、三十二相、八十隨形好，無量光明，神通變化，能以一指動十方三千大千國土，梵音說法，無厭色身，十力、四無所畏、十八不共法、無礙解脫、一切種智、大慈大悲等；具足無量諸佛法，然後能教化衆生，衆生必能信受。得如是力，假令妄語，人猶當信，何況實語。如經說：我雖知諸法實相，能入涅槃，但爲衆生故行檀波羅蜜等。如經中廣說：乃至不可以異事度衆生。

畢竟空中，諸波羅蜜實無差別，若無般若波羅蜜，五法云何得波羅蜜名字？五波羅蜜未入般若時，有差別，既入般若則無差別。皆是般若力故。

分別說六波羅蜜，皆爲世俗故，何以故？世人不可但爲說諸法實相，聞則迷悶，生於疑悔，是故以第一義爲心，用世俗語言爲說，是故說分別有諸波羅蜜教化衆生。衆生實無有法，皆是空，不生不死，不退不起，色等法亦如是。是故般若波羅蜜雖空，能示如是事故，於中最爲第一而最上、最妙。般若波羅蜜守護一切善法，至薩婆若中住者，一切法雖空，若無般若，一切諸善法皆不能至薩婆若。善法者，五波羅蜜、三十七品、大慈大悲等諸善法。雖諸善法和合能破煩惱，得阿耨多羅三藐三菩提，而般若波羅蜜於中功力最大。

是般若無取無捨，雖言取薩婆若，以不取法故取，住義亦如是。所謂一切法不取相，一切法者，色乃至菩提。是法虛誑，從因緣生，自性無故不取，不取故不捨，以不憶念取相故。若菩薩

能滅一切法中憶念，即是空、無相、無作解脫門，解脫即是諸法實相。雖有善根，以取相著心顛倒故不增長。以衆生憶念故，生三界善、不善處，若無憶念則不著，不著則不生。色等一切法中不住，乃至不住中亦不住，不取相故不著，不著故則不住。是菩薩不見法有可著可住。

若菩薩住是衆生空、法空，作是念：能如是行者，則是失，則是離。何以故？般若波羅蜜是不著相，是菩薩以我心，外著空，內著我，不如般若行故，言遠離般若，何以故？般若波羅蜜是不著相，以性無故。上以著空故失，今以破空得般若，而著般若無性故失。失故不得受記。

若菩薩於一切法不生，是名能行般若，是菩薩不說是色若常、若無常等，是色、誰色。是色、破色，誰色、破人；色乃至一切種智，亦如是。若法如是畢竟空，推求不可得，是不可生。所以者何？性不能生性，無性不能生無性；如是等破顛倒，得實論議，皆是般若波羅密力，餘波羅密皆隨從。般若力故，諸餘法皆是實性，同至佛道。五波羅密入般若中雖無差別，以是事故而般若波羅密最尊、最妙。

至於何等是菩薩道？何等非菩薩道？二乘非菩薩道，雖同行空、同求涅槃，粗事人不疑，細事人疑故。薩婆若是菩薩道，因中說果故，菩薩具足六波羅密、慈等諸功德，是故佛言：「若有菩薩摩訶薩如般若波羅密所說住，當知是菩薩摩訶薩是阿鞞跋致，爲諸佛所念。如是方便力成就，當知是菩薩親近供養無量千萬億諸佛種善根，與善知識相隨，行六波羅密，久修十八空、四念處乃至八聖道分，佛十力乃至一切種智。當知是菩薩住法王子地，滿足諸願，常不離諸佛，不離諸善根。」

菩薩摩訶薩，自具足而後以方便力，度脫衆生生死。